

Brütigam im Flugmodus

Eine turbulente Komödie in einem Akt von Jonas Thomi

Personen (ca. Einsätze)	3-4 H / 2-3 D 6 Pers.	ca. 55 Min.
Benjamin Hauser (105)	Trauzeuge, Ehemann von Lena	
Alexander Hofmann (92)	guter Freund	
Lena Hauser (68)	Trauzeugin, Ehefrau von Ben	
Mira Langhals (53)	Braut	
Mirco Dupois/Till Becker (54)	Passagier/Brütigam	
Elka Stadler* (36)	Reinigungsfachfrau	

**Diese Rolle kann mit wenigen Anpassungen auch von einem Herren gespielt werden.*

Zeit:	Gegenwart
Ort der Handlung:	Flughafen Terminal A

Das Recht zur Aufführung:

Es sind mindestens **7** neue Texthefte vom Verlag käuflich zu erwerben. Das Ausleihen oder Abschreiben der Pflichtexemplare ist untersagt und wird nötigenfalls gerichtlich geahndet. (*Gesetz betreffend Urheberrecht*)

Bezahlung einer Aufführungsgebühr für jede Aufführung zugunsten des Autors an den Theaterverlag Breuninger in Aarau. Die Aufführungsrechte sind vor den Proben beim Verlag einzuholen.

Vereine, die diese Bestimmungen zu umgehen versuchen, haben die doppelten Aufführungsgebühren zu bezahlen.

Verfasser und Verlag

Unsere Texthefte sind in den Formaten A-4 (*gross*) und A-5 (*klein*) erhältlich. Bitte geben Sie bei der Bestellung die gewünschte Grösse an.

Inhaltsangabe:

Sind Sie auch schon einmal nach einem wilden Polterabend am Flughafen aufgewacht – verwirrt, verkatert und ohne zu wissen, was genau passiert ist? Nein? Doch für Ben und Alex wird genau dieser Albtraum wahr. Die beiden erinnern sich nur noch bruchstückhaft daran, dass sie gestern den Polterabend ihres besten Freundes Till feierten. Doch Alex und Ben haben nicht nur jede Erinnerung verloren, sondern auch Till selbst. Die Zeit tickt! Bald hebt der Flieger ab nach Teneriffa, wo Till seine Verlobte Mira heiraten soll. So geraten die beiden Freunde in ein Chaos aus Missverständnissen und absurden Begegnungen. Können sie Till noch rechtzeitig finden, damit die Hochzeit doch noch stattfinden kann?

Bühnenbild:

Man sieht den Toilettenbereich des Terminals A am Flughafen. In der Mitte der Bühne stehen acht schwarze Stühle – jeweils zwei stehen Rücken an Rücken zueinander. Links befinden sich die Türen zu Herren- und Damentoiletten und dazwischen ein Stuhl. Rechts vorne befindet sich eine Türe, die in den Putzraum führt. Rechts hinten gelangt man über einen offenen Abgang zu den Gates A. Hinter den acht Stühlen steht eine grössere Pflanze sowie zwei Stehtische. An der Decke der Bühne hängt ein Richtungsschild mit der Aufschrift „Gates A50-A59“. Zusätzlich können Flughafen-Werbeplakate aufgehängt werden.

Hinweis: Alle Koffer und Rucksäcke entsprechen dem Handgepäckformat.



Regie-Booklet:

Für dieses Stück ist ein Regie-Booklet erhältlich. Dieses enthält zahlreiche Hilfsmittel wie z. B. eine Requisitenliste oder einen Szenenplan. Scannen Sie den QR-Code für weitere Informationen.



1. Akt

1. Szene: Wo isch de Till!?

Alex, Ben, Elka

(Der Vorhang ist noch geschlossen. Das Geräusch eines Flugzeugstarts ist zu hören)

Ansage Flughafen: *(ab Band)* Liebe Fluggäste: Bitte beachten Sie die aktuellen Informationen auf den Anzeigetafeln und informieren Sie sich über Ihren Flugstatus. Bei Fragen wenden Sie sich bitte direkt an Ihre Fluggesellschaft oder an den Service Point. Wir wünschen Ihnen eine angenehme Reise.

(Der Vorhang öffnet sich. Ben schläft auf einem der Stühle, Alex angelehnt an der Wand. Beide tragen mitgenommene, aber einst stilvolle Kleider vom gestrigen Polterabend. Alex hat Glitzer in den Haaren, Ben am Hinterkopf getrocknetes Ketchup. Neben Alex steht eine halbleere Bierflasche, ein Koffer und ein Rucksack liegen daneben. Grundsätzlich wirkt Ben eher gepflegt und bedacht, wird aber schnell hysterisch – im Gegensatz zu Alex, der chaotisch, charmant und stets tiefenentspannt ist. Nach einem Moment kommt Elka aus dem Putzraum. Sie ist eine ältere Dame mit einem offenen Putzmantel und darunter skurrile, farbige Kleider. Dazu kombiniert sie auffällige Accessoires. Die Haare hat sie mit einem Stoffhaargummi hochgesteckt. Vor sich schiebt sie ihren Putzwagen mit Wischmopp und Eimer, Lappen, Putzmitteln, Staubfänger und Trinkgeldteller. Elka wirkt chaotisch, lebendig und leicht esoterisch)

Elka: *(pfeift, zum Publikum)* Guete Morgeeee mitenand! *(nimmt den Boden mit Wischmopp auf, pfeift und tänzelt dabei, putzt eigenartig)* Oh jemine! Joa, isch geschter wieder chli z viel gsi? *(lacht, zum Publikum)* Sie müend ebe wüsse, das isch bi mir fruehner ned anderscht gsi! Joa! „Dänzing Qwin“ *(in Akzent: Dancing Queen)* hett mer mir amigs gseit! *(putzt weiter, pfeift)* Entschuldigung! *(hebt Bens Beine, putzt darunter)* Danke! *(legt Beine hin, merkt)* Jesses, ich muss jo no dringend d WCs putze! *(zum Publikum)* Adieu mitenand! *(nimmt Putzmittel und Lappen, Abgang Herren-WC)*

Ben: *(wacht plötzlich auf, verkatert)* Scheisse! *(schaut um sich)* Scheisse!

Alex: *(wacht auf)* Schrei ned so! *(schaut um sich)* Ben, was isch passiert?

Ben: Alex, wo sind mir? *(bemerkt Kopfschmerzen)* Ohhh, min Chopf...

Alex: *(lacht)* Verreckt! Gsehsch du beschisse us! *(bemerkt Kopfschmerzen)*

Ben: Lueg dich mol aa... du ggesch us, als hett sich en Konfettikanone mit eme Staubfänger paart! Und du bisch s Ergebnis devo...

Alex: Ben!? Was verdammt isch geschter Obig passiert!?

Ben: *(sieht Beschriftung)* Gate A!? *(denkt nach, kühl)* Das heisst jo... mir sind am Flughafe! Gate A... also au scho hinter de Sicherheitskontrolle. *(hysterisch, schreit)* Alex! Wieso sind mir am Flughafe!?

Alex: Lueg mich ned so aa... ich han absolut kei Ahnig, was los isch...

Ben: *(hysterisch, schreit)* Ich han überhaupt kei Erinnerige meh a geschter Obig! Keis bitzli meh! Mini ganze Erinnerige sind weg!

Alex: *(lacht, plötzlich ernst)* Das muss en schlechte Traum sii! *(ohrfeigt Ben)*

Ben: Was söll de Schissdräck!? *(haut zurück, fasst sich an den Kopf)* Ahh, min Chopf...

Alex: Jojo, jetzt übertrieb ned...

Ben: Ich han do öppis i mine Haar! *(ernst, merkt)* Das fühlt sich... *(Hand wird rot)* Alex, ich blüettteeee!

Alex: Tuen jetzt ned schwierig... so fest isch die Ohrflättere jetzt au ned gsi! *(sieht das Blut, ernst)* Ben, ich bin für dich do! *(überfordert)* Stabili Siitelag!? *(stösst Ben auf Boden)* Ohhh, wie isch das nomol gange!? Das Bei so... Hand? *(hysterisch)* Ich han doch kei Ahnig...

Ben: Lass mich los! *(verwirrt)* Das Blut schmöckt irgendwie komisch...

Alex: Bliib bi mir, Ben! Hesch verstande?! Wie viel Finger zeig ich!?

Ben: *(probiert)* Alex! Das isch kei Blut! Das isch Ketchup...

Alex: *(verwirrt)* Verreckt! Du blüetisch Ketchup!? *(merkt)* Was!? Wieso hesch du Ketchup am Chopf!?

Ben: *(wischt mit Taschentücher weg)* Kei Ahnig.

Alex: *(hat einen Einfall)* Wo isch mis Handy!? *(nimmt es aus der Hosentasche hervor)* Jo klar... *(zeigt)* Das isch min Rucksack! *(liest)* und din Koffer... ich han s! *(Pause)* Mir flüged hüt!

Ben: *(ironisch)* Ah was!? Wüirklich? Das hett ich jetzt ned erwartet! Amene Flughafe!

Alex: Uf Teneriffa... d Hochziit vo de Mira und em Till!

Ben: *(erinnert sich)* Jo klar! Mir händ geschter Obig im Till sin Polterabig gfiiret. Du, ich... und de Till!

Ben: *(schaut Alex an, gleichzeitig)* De Till!

Alex: *(schaut Ben an, gleichzeitig)* De Till!

Ben: Wo isch de Till?!

Alex: *(lacht)* Verreckt! Du! Ich glaub, de händ mir verlore!

Ben: *(hysterisch)* Das isch ned lustig!! *(denkt nach)* Das wär jo die absoluti Vollkatastrophe! Mir müend unbedingt de Till finde! Bevor d Mira und d Lena do stöhnd!

Alex: *(lacht)* Vielleicht händs ihn im Fundbüro abgäh.

Ben: Quatsch! Wart, ich lüüt ihm mol aa!

Alex: De Till isch sicher irgendwo do... jetzt schalt mol en Gang abe!

Ben: *(schreit)* Es chunnt nur d Combox! *(hysterisch)* Ich glaube, dir isch ned ganz klar, was das für öis bedüet! Wenn de Till hüt ned pünktlich do stoht, denn verpassed mir de Flug! Die Hochziit chan ned ohni ihn stattfinde!

(Bens Handy klingelt)

Alex: Gsehsch, er lüüetet scho zrug.

Ben: Scheisse, das isch d Lena! Was söll ich ihre säge!?

Alex: Nimm eifach ned ab!

Ben: *(verzweifelt)* Scho passiert. *(ins Handy)* Hallo Schatz! ...Jo, also, nei, alles bestens! Öis gohts prima... Wo mir sind? Jo, am Flughafe? Wie abgmacht... *(unsicher)* oder?... Was? Vor de Sicherheitskontrolle!? ...Nei, mir sind scho bi de Gates! Bi de WCs hinde. Mir händ dänkt, mir göhnd schomol ine... Was? De Till? *(Blick zu Alex, dieser nickt)* Jo natürlich, de Till isch au do!?... Wie? *(flüsternd zu Alex)* D Lena wott mit em Till schwätze!

Alex: *(überlegt, flüstert)* Er isch uf em WC!

Ben: *(zu Lena)* Er isch grad uf em WC! ...Jo? ...Jo! ...Jo, genau! ...Jo natürlich... Jo, ich weiss... Lena, ich bin ned blöd, jo... Was!? De Till söll zrug lüte?

Alex: *(reisst Handy aus Bens Hand)* Sali Lena... Jo, do isch de Alex! *(imitiert schlechte Verbindung)* Genau!... „psfrfssch“... ich han nur welle säge... „prfschivsch“... Lena, ich ghör dich ned!... „prfsch“... Schlächti Verbindig. Sorry! Ich hänk ab! *(zu Ben)* So macht mer das!

Ben: Bisch du eigentlich uf de Chopf gheit?

Alex: Bis doch froh! Ich verschaffe öis nume meh Ziit! Bis d Lena und d Mira dur d Sicherheitskontrolle cho sind, chönd mir de Till sueche! *(beruhigend)* De taucht scho wieder uf!

2. Szene: Putz-Orakel

Alex, Ben, Elka

Elka: *(kommt genervt aus dem Herren-WC)* Die Mönschheit! Es wird immer schlimmer! Do hett öpper s Manne-WC voll mit Ketchup verschmiert.

(Ben verdeckt seinen Kopf)

Elka: S ganze Bränneli isch volle! *(überlegt, lacht)* Und Sie zwöi? Sie händ wohl en aastrengendi Nacht hinter sich.

Alex: Hehe, sie sägeds. Sehr aastrengend...

Elka: Joa, ich säg jo immer: Was im Usgang passiert, bleibt im Usgang! Do will mer sich jo am Morge lieber nūme so aa alles erinnere chöne...

Alex: Es isch ebe eso: Mir händ geschter de Polterabig vo öisem beste Kolleg gfiiret. Und jetzt...

Ben: *(unterbricht)* ...händ mir schlichtweg kein blasse Schimmer meh, was geschter passiert isch!

Elka: *(lacht)* Jesses nei, so öppis han ich jetzt au no nie erlebt. Und debi schaff ich do am Flughafe jo scho sit 37 Jahr. Joa, Sie müend ebe wüsse...

Ben: *(unterbricht, hysterisch)* Mir händ öise besti Kolleg verlore... mir fiired morn sini Hochziit!

Elka: *(lacht lange)* Unter dene Umständ, wie säg ich immer: ehnder suboptimal. Uf jede Fall: ich wünsch Ihne beidne viel Erfolg! *(geht zurück ins Herren-WC)*

Ben: *(hysterisch)* Mir sind ufgschmisse! Was mached mir jetzt?

Alex: Ben! Chill mol! Das loht sich sicher alles ganz eifach erkläre...

Ben: Wenn s nur en Möglichkeit gäbti, öisi Erinnerungige zruggzbecho... *(lacht verzweifelt)* Ich würd sogar defür zahle!

Elka: *(streckt ihren Kopf heraus, aufdringlich)* Joa, ich chönnt Ihne scho hälfe, sich aa geschter Obig z erinnere...

Ben: *(gleichzeitig, platzt heraus)* Wie?

Alex: *(gleichzeitig, platzt heraus)* Wie?

Elka: *(lügt)* Sie müend ebe wüsse, ich han vor es paar Johr sone Wiiterbildig gmacht, als... wie heisst das jetzt scho wieder? *(lacht)* Joa, isch jo au Wurst! Eifach öppis mit Meditiere, Erinnerungige... und no anderem Züügs!

Ben: *(ironisch)* Jo klar und ich bin Pirat, Astronaut und Wiehnachtsmaa!

Alex: Ben! Mir müend das usprobiere!

Ben: Alex, die verarscht öis doch!?

Alex: Verreckt! Es chostet öis jo nüüt...

Elka: Joa, wüssed Sie... als Putzfrau verdient mer jo praktisch nüüt... en Hungerslohn, wüssed Sie! *(schüttelt Trinkgeld-Teller auffällig unauffällig)*

Alex: Er zahlt! Er isch jo schliesslich de Trauzüüg! *(lacht)*

Ben: *(denkt nach, unsicher)* Mhmm, ich lueg mol was ich han. *(nimmt Portmonnaie hervor)* 5 Franke? Das sött lange. *(legt das Geld auf den Teller)*

Elka: Das isch jetzt aber lieb... *(ironisch)* Das wär jo jetzt würllich ned nötig gsi... joa, würllich... *(nimmt Lappen, putzt)*

Alex: Also, was isch jetzt!?

Elka: Entschuldigung!? 5 Franke? Das langed jo maximal für es Weggli mit Schoggistängeli!!

Alex: *(reisst das Portmonnaie aus der Hand)* 50 Franke?

Ben: Bisch du eigentlich vo allne guete Geischer verloh!?

Elka: *(stopft Note in Ausschnitt, lacht, zum Publikum)* Ich hett nie erwartet, dass das funktioniert! *(zu beiden, improvisiert)* Chömed Sie, setzed Sie sich do ane!

(Alex und Ben setzen sich jeweils links und rechts neben Elka und geben sich Hände)

Ben: Alex, das isch doch totale Quatsch!

Elka: *(zu Ben, genervt)* Sie händ Schweissshänd, isch rächt unagnehm! Konzentration! Mached Sie d Auge zue... und jetzt göhnd Sie tüüf ii sich inne. *(theatralisch)* Tüüf atme... No tüüfer iiatme...

Ben: Ich chan ned so tüüf schnufe, ich han Asthma.

Elka: Konzentration! *(noch theatralischer)* Chum, Gedächtnis... chum... chum... chum zu öis zugg! Joaaa... *(Ben schaut verstört, schliesst die Augen wieder)* Ich gseh... *(improvisiert, Einfall)* es isch Nacht? *(sie öffnet die Augen, Alex nickt, wirkt nun selbstsicher)* Ich ghör... Musik! Ganz luut!

Alex: *(schreit laut heraus)* Trocheni Polenta!

Ben: *(erschrickt)* Was!?

Elka: *(theatralisch)* Joa, ich gspüür... Sie sind inere Bar... oder imene Club?

Alex: Gsehsch Ben! Sie isch guet i dem!!

Elka: *(verschluckt sich)* Selbstverständlich! Johrzehntelangi Erfahrig!

Ben: *(genervt)* Und wo isch jetzt de Till?

Elka: Fokus! Sie trinked... öppis starchs? Ich gspüürs!

Ben: *(ironisch)* Espresso?

Elka: Nei... stärcher!

Alex: Doppelte Espresso?

Elka: *(genervt)* Nei, ich mein dank Alkohol! Bier! Schnaps! Wyy! Joa, irgendöppis starchs! *(wieder ernst)* Aber mir sind uf de richtige Spur! Ich gspüürs!

Alex: Uf de Überholspur? A1, Richtig Züri?

Ben: *(genervt)* Ehnder Sackgass! Richtig totali Vollkatastrophe!

Elka: *(übertrieben)* Uhhhhhhh... ich gspüür öppis cho... *(unangenehme Pause)*

Ben: *(Einfall)* Halloween!

Elka: *(schreit heraus)* Halloween!! *(verwirrt)* Was!?

Alex: Halloween!? Was meinsch mit dem?

Ben: Ich chan mich irgendwie aa öppis erinnere... öppis mit Halloween
(denkt nach) Aber, ich weiss nüme... *(zu sich)* Ben, riss dich zäme!

Alex: *(denkt auch nach)* Mhmm, also mir seit das gar nüüt!

Elka: Et voilà! Joa, han ich doch gseit, dass ich hälfe chan!

Ben: Mir wüssed jetzt aber immer nonig, wo de Till isch!

Elka: *(schaut auf die Uhr)* Jesses, es isch jo scho wahnsinnig spoot! Ich muess jo no dringend d WCs fertig putze! *(lacht)* Adieu mitenand und gueti Reis! *(ab zum Herren-WC)*

Alex: Aber... *(stöhnt auf)* Verreckt! Lueg mol, wer det chunnt!

3. Szene: Mer hürotet jo nur eimol!

Alex, Ben, Lena, Mira

(Lena kommt aus Gate A. Sie trägt eine helle Bluse mit einer eleganten Hose und einem offenen Mantel. Sie schiebt einen Rollkoffer mit einer kleinen violetten Schleife und trägt eine schicke Handtasche. Make-up und Haare sind perfekt gestylt. Allgemein wirkt Lena dominant, kühl und organisiert – im Moment vorallem gestresst)

Ben: *(zu Alex)* Jetzt chan öis wüirklich nur no es Wunder hälfe! *(zu Lena)* Lena, Schatz! Was, du bisch scho do? *(will sie küssen)* Schnell gange!

Lena: Benjamin! *(angewidert)* Ihhh! Ich weiss ned, nach was du am meischte stinksch: Alkohol, Rauch oder Schweiss!

(Alex will sie umarmen)

Lena: Dänk gar ned dra! *(schaut sie durchdringend an)* Isch bi öich alles in Ordni?!?

Ben: *(gleichzeitig, murmelnd)* Jo, klar... bi öis isch alles tiptop!

Alex: *(gleichzeitig, murmelnd)* Besser chönnts gar ned sii...

Lena: *(dreht sich um)* Wo isch jetzt d Mira wieder? *(gestresst)* Ich bin jo so froh, wenn mir eifach im Flüger sitzed und nüüt meh chan schief goh!
(stellt ihren Koffer zu Bens)

Ben: *(gleichzeitig, murmelnd)* Es sött nüüt schief goh...

Alex: *(gleichzeitig, murmelnd)* Froh, wenn mir im Flüger sitzed...

Lena: D Familie vo de Mira chunnt öis denn am Flughafe goh abhole und bringt öis zu ihrem Huus! Direkt am Meer! *(schaut aufs Handy)* Und d Familie vom Till isch geschter Obig guet aacho... Genau! *(überlegt)* Wo isch eigentlich de Till!?

Ben: *(gleichzeitig, murmelnd)* Jo, also... es isch ebe so... ähm...

Alex: *(gleichzeitig, murmelnd)* Ich... mir händ... es... chliises...

Lena: *(ängstlich)* Benjamin! Was isch passiert!? Wo isch de Till!?

(Mira kommt aus Gate A. Sie trägt ein sommerliches Kleid und darüber einen Mantel. Dazu eine schlichte Handtasche, einen Sommerhut und darauf eine Sonnenbrille. Sie trägt dezentes Make-up und offene Haare. Im Gegensatz zu Lena wirkt Mira im Allgemeinen sehr herzlich, träumerisch und ein wenig chaotisch)

Mira: Do sind ihr jo äntlich! *(umarmt die beiden)*

Alex: Mira, du gsehsch top us.

Mira: Gäll, dankeee! *(dreht sich)* Das Outfit isch neu!

Lena: *(herzlich)* Muus, du gsehsch wundervoll us! *(bissig zu Ben und Alex)* Händ ihr öich emol aagluegt!?

Mira: Ahhh! Es isch so wiit! Min grosse Moment isch äntlich do! Mini Hochziit! *(verliebt)* Nur ich und de Till!... Und ihr drü und alli andere! *(lacht)* Das wird de Wahnsinn! *(merkt)* Wo isch denn überhaupt min Brütigam?

Ben: Also, das isch ebe chli kompliziert!

Alex: Wo sölled mir do am beste aafange? Er isch...

Lena: *(unterbricht)* Er isch uf em WC!

Ben: *(gleichzeitig)* Hä?

Alex: *(gleichzeitig)* Hä?

Lena: *(überspielt)* Er isch uf em WC! Wo sött er au suscht sii...

Ben: *(gleichzeitig, murmelnd)* Jojo, natürlich isch er uf em WC...

Alex: *(gleichzeitig, murmelnd)* Jo, uf em WC... wo au suscht...

Mira: Jo, natürlich! Wüssed ihr, ich bin es bitzeli nervös! Ich will eifach, dass mini Hochziit perfekt wird! MAGISCH! Verstönd ihr, was ich meine!?

Lena: Muus! Natürlich verstönd mir, was du meinsch! Mer hürotet jo schliesslich nur eimol!

Ben: *(klugscheisserisch)* Ich wott jo ned klugscheisse, aber das isch ned ganz korrekt. Es git Lüüt, die hürotet mehrmols... chan jo sii, dass de Partner stirbt...

Alex: ...oder er goht fremd...

Ben: *(lacht)* ...oder mer bechunnt schrecklichi Chind...

Alex: *(platz heraus, lacht)* ...und de Ehemaa haut denn „churz“ ab...

Ben: *(ernst, überspielt)* ...oder es chunnt gar ned zur Hochziit, will de Brütigam churz vorher verlore gange isch!

Lena: *(unterbricht, bissig)* Haltet de Schnabel! Ihr händ definitiv z viel Hollywood-Film gluegt... *(liebevoll)* Dini Hochziit wird perfekt! Das versprich ich dir! Awww, ich freu mich so für dich! *(umarmt Mira, fischt geschickt ihre Brille von ihrem Hut)* Ohje, Mira? Wo isch dini Sunnebrülle? Die isch doch grad no do uf dim Huet gsi!?

Mira: Was?

Lena: Du hesch sie sicher uf em Weg do ane verlore. Lauf doch schnell zrug, denn findsch sie vielleicht no.

Mira: Gueti Idee! Bis nachher! *(geht beim Gate A ab)*

4. Szene: Denn bring ich öich um!

Alex, Ben, Lena

Lena: *(bissig)* Ihr säged mir jetzt sofort: Wo isch de Till!?

Alex: Hehe, gueti Frog, nöchsti Frog! *(böser Blick Lena)* Er isch uf em WC!

Lena: Lüged mich ned aa! Was isch geschter passiert!?

Ben: *(kleinlaut)* Mir sinds grad no am ermittle...

Lena: *(schreit)* Was dänked ihr, wer ihr sind? Es Ermittlerduo? Kommissar Kater und Kommissar Filmriss?

Ben: Schrei bitte ned so! D Lüüt lueged scho... ich han alles unter Kontrolle!

Lena: Ich glaub dir keis Wort! WO ISCH DE TILL!?

Ben: *(genervt)* Du hesch null vertraue ii mich. Wenn ich säge ich han alles unter Kontrolle, denn han ich alles unter Kontrolle!

Lena: *(hartnäckig, unangenehme Pause)* Wenn du mir jetzt seisch, dass de Till ned do isch... *(lacht)* jo denn... *(todernst)* ...denn bring ich öich um!

Ben: Du kennsch öis zwöi! Mir reglet das...

Alex: *(plappert nach)* Jo voll! Mir reglet das!

Lena: Benjamin, du hesch nur ei einzigi Ufgab gha! Ich han alles ellei organisiert! Die einzig Ufgab, wo du als Trauzüüg gha hesch, isch, dass de Till pünktlich do stoht! Du hesch genau zäh Minute, das alles in Griff z becho! Hesch mich verstande!?

Ben: *(kleinlaut)* Jo, ich han verstande...

Lena: Und wüssed ihr was!? Chaufed en Deo! Ihr stinked! *(geht Richtung Gate A ab)*

Alex: *(entdeckt den Putzwagen)* Putzmittel tuets au. *(spritzt sich Putzmittel unter die Achseln)*

Ben: Alex, mir bruched jetzt äntlich en Plan! Ich gang emol bim Gate goh luege. Du bliibsch do! Versuech de Till per Telefon z erreiche! *(schnell bei Gate A ab)*

5. Szene: Verreckt! En Franzos!

Alex, Mirco

Alex: *(zu sich)* Im Till aalüte... *(sein Handy piepst)* Verreckt! Ich muss jo no dringend Duolingo mache! *(beginnt)* Was für en Schissdräck, die App! *(ins Handy)* The orange penguin dances on my toaster every tuesday.

(Mirco kommt aus Gate A. Er trägt einen schicken Anzug und hat einen identischen Rollkoffer wie Lena, jedoch ohne Schleife. Er trägt dunkle Kopfhörer und spricht mit französischem Akzent. Mirco fliegt geschäftlich und ist leicht angespannt)

Alex: *(schaut verwirrt hoch)* Ich glaub, mich knutscht en Elch! TILL! Do bisch jo äntlich! *(kollegiale Umarmung)*

Mirco: Pardon? Isch verstehe nischt.

Alex: *(lacht, imitiert ihn)* Oh, oui, Monsieur! Isch verstehe ausch nischts mehr! *(ernst)* Wo hesch du gsteckt, Mann!?

Mirco: Wie bitte?

Alex: *(übertrieben ausgesprochen)* WO-HESCH-DU-GSTECKT, MANN!?

Mirco: Excusez-moi! Aber isch denke, dass müss eine... wie sagt man en allemand... Verwechselung sein?

Alex: *(verwirrt)* Till?

Mirco: Non? Nein! Mein Name ist Mirco! Mirco Dupois!

Alex: Verreckt! En Franzos! *(in Hochdeutsch)* Entschuldigen Sie mich! *(ungangenehme Stille)* Sie müssen eben wissen: Sie sehen tupfengleich aus, wie mein Kolleg! Das ist ja der füdliblutte Wahnsinn!

Mirco: *(verwirrt)* Füdeli... was? Isch verstehe nischt... *(zieht Kopfhörer an, geht in Herren-WC ab)*

Alex: Das glaubsch jo ned! Do wird jo de Hund ii de Pfanne verruckt!

Ansage Flughafen: *(ab Band)* Liebe Fluggäste, soeben wurde der kleine Kevin gefunden und befindet sich derzeit am Service-Point Gate A. Wir bitten die zuständigen Angehörigen, sich schnellstmöglich dorthin zu begeben. Vielen Dank für Ihre Aufmerksamkeit und Mithilfe.

Alex: Das isch es! Ben! Ich han die Idee! Ben! *(rennt in Richtung Gate A ab)*

6. Szene: Alles im Griff!

Lena, Mira, (Elka)

(Lena und Mira kommen von Gate A)

Mira: Uii, was hett denn de gstoche!? *(lacht, ernst)* Mis Bruutchleid isch ii dim Koffer, korrekt? *(wiederholt)* KORREKT!?

Lena: Ach Muus! Ich han alles im Griff! Es isch alles organisiert! Dis Chleid isch do ii mim Handgepäck. Ich han s persönlich hüt Morge drii gleit!

(Elka kommt von Herren-WC, sitzt auf den Stuhl und liest Zeitung, hört sehr gut zu)

Mira: Okay, okay, sehr guet! *(nervös)* Und d Ehering? Lena, ich glaub mir händ d Ehering vergässe?

Lena: Mira! Ich träg d Ring persönlich ii mim Täschli! *(zeigt die Ringkisten)*

Mira: Denn isch tiptop... *(atmet aus)* Weisch du, ich wott eifach, dass aa minere Hochziit nüüt schief goht!

Lena: *(liebepoll)* Es wird alles so klappe, so wien ich s plant han!

Mira: Ich muss no schnell uf s WC. *(schaut auf die Uhr)* Nachher müend mir vorwärts mache! *(lacht nervös)* Suscht verpassed mir no de Flug...

Lena: *(ironisch)* Das muesch ned mir säge, ich weiss...

Ansage Flughafen: *(ab Band)* Liebe Fluggäste, eine weitere Meldung! Der kleine Till!? ...Was? ...Tilas? Der kleine Tilas wird vermisst! Falls Sie einen kleinen Jungen sehen, dann kommen Sie bitte zum Service-Point. Tilas ist... Wie alt? Was? 32-i!? *(je nach Alter anpassen)*

Ansage Alex: *(ab Band, unterbricht)* Til... *(hustet)* ...-as, wenn du mich ghörsch! Denn chum do ane!

Ansage Flughafen: *(ab Band, schreit)* Gohts eigentlich no!? Sie Trottel chönd doch ned eifach... *(merkt)* Scheisse, s Mikrofon isch jo no aa! *(nett)* Vielen Dank für Ihre Aufmerksamkeit! Wir wünschen Ihnen eine angenehme Reise!

Mira: Das isch doch de Alex gsi!

Lena: Nei!

Mira: Doch!

Lena: Nei! *(überspielt)* Hesch du ned gseit, dass du uf s WC muesch!

Mira: Das isch doch ganz klar im Alex sini Stimm gsi! Isch ächt öppis passiert!?

Lena: *(nett)* Quatsch, de Alex tönt ganz andersch! Und wer isch überhaupt de Tilas!? Mach jetzt vorwärts und gang uf s WC! *(schiebt Mira ins Damen-WC, dann zu sich)* Das chan jo nume no schief goh!

7. Szene: Entschuldigung?

Mirco, Lena, Elka

(Mirco kommt vom Herren-WC, Elka schüttelt den Trinkgeldteller, er gibt Trinkgeld)

Lena: Till!? Du bisch jo tatsächlich uf em WC gsi!?

Mirco: *(nimmt Kopfhörer ab)* Entschuldigung...

Lena: *(explodiert)* Nei nei, spar dir dini Usrede! Ich han öich tuusig Mol gseit, es isch dumm am Tag vor de Abreis en Polterabig z mache... aber natürlich lost mer wieder mol ned uf mich!

Mirco: Aber...

Lena: Bis still, Till! Ich bin nonig fertig, ich han erst grad aagfange! *(legt ihre Tasche auf den Putzwagen, gestikuliert wild und spricht immer schneller)* Und jetzt stöhd mir do, de Benjamin komplett unfähig, de Alexander sowieso kei Hilf und du...

Elka: So öppis absurds han ich jetzt würrklich au no nie erläbt...

Lena: Entschuldigd Sie bitte: Hett Sie öpper nach Ihrere Meinig gfrogt!?

Elka: Natürlich ned, nei! Ich misch mich do ganz bestimmt ned ii! *(lacht)*

Mirco: *(stottert)* Aber... ähm...

Lena: *(imitiert)* Aber... ähm... klar, dass du jetzt wieder keis Wort usse bechunsch!

(Elka und Mirco schauen sich an. Elka macht eine Durchgeknallt-Geste)

Lena: Ich han x-Stunde für öiches Hochziit investiert! Du chasch dir gar ned vorstelle, was ich alles für öich planed han: Checkliste, Catering, Sitzplan, sogar die unbedingt passende blöde rote Serviette!

Mirco: Bitte...?

Lena: Jo, d Serviette... d Mira hett unbedingt roti Serviette welle... ROT!? Ich treih im Rote!

Mirco: *(streckt Hand hoch)* Ähm...

Lena: Hand abe! Es interessiert mich ned, wie du dich rechtfertige wottsch! Was händ ihr öich debi dänkt!?

(Elka schüttelt den Kopf, Abgang mit Putzwagen in Putzraum)

Mirco: Aber, Entschuldigung...

Lena: Ich weiss, ich gibe soviel! Immer 100%! Aber weisch was? Irgendwann chum au ich mol aa mini Grenze! Irgendwann chan ich au eifach nüme! *(sucht ihre Tasche)* Gopf, wo isch jetzt mini... nei, nei, nei! Das dörf doch ned wöhr sii! Wo isch mini Tasche!? *(merkt)* D Ehering! Scheisse! Das isch en Katastrophe! *(überlegt)* Ich muess

öpper vom Personal finde! Till, bliib do und lueg uf öisi Köffere! *(eilt beim Gate A ab)*

Mirco: *(verwirrt, zu sich)* C'est absurde! Je n'ai rien fait. Merde! *(zieht seine Kopfhörer an, setzt sich mit Rücken zum WC hin, nimmt Apfel hervor)*

8. Szene: Umefummlerei

Mirco, Mira

Mira: *(kommt vom Damen-WC)* Lena, mir müend unbedingt nomal über d Serviette rede... Lena? *(sieht Mirco)* Schatz, do bisch jo äntlich... *(schleicht sich an, verdeckt seine Augen)*

Mirco: Mon Dieu! *(zieht Kopfhörer aus)*

Mira: *(überhört)* Rot emol wer do isch...

(Mirco verschluckt sich am Apfel)

Mira: *(schlägt auf Rücken, streichelt Schultern, erotisch)* Du bisch kräftig worde! Sit wenn hesch du so breiti... so verdammt sexy... Schultere?

Mirco: Isch glaube...

Mira: *(unterbricht, legt erotisch Finger auf seinen Mund)* Psssst... ich wott nüüt ghöre... *(massiert zu hart)*

Mirco: Oh là là!

Mira: *(imitiert, erotisch)* Oh là là... ich han dich geschter Obig vermisst... *(küsst ihn zärtlich am Hals – entsteht ein Lippenstiftabdruck)*

Mirco: Also das... *(möchte aufstehen)*

Mira: *(unterbricht, drückt ihn runter)* Psssst... ich han dich so fest vermisst, dass ich die Nacht sogar vo dir träumt han!

Mirco: Entschuldigung...

Mira: *(unterbricht)* Und es isch en 18+ Traum gsi, wenn du verstohsch, was ich meine! *(wuschelt wild in seinen Haaren)*

Mirco: Nein, also...

Mira: Wenn du wüsstisch, was ich alles mit dir ii öisere Hochziitsnacht vor han! *(fässt ihm an die Brust)*

Mirco: Pardon! *(nimmt ihre Hände weg)*

Mira: Was isch? *(verwirrt)*

Mirco: *(explodiert)* Excusez-moi, isch glaube das muss seine eine Verwechslung! Ne me touchez pas!

Mira: Wie bitte?

Mirco: Finger ab die Röschi! Mon Dieu!

Mira: *(verwirrt)* Entschuldigung, ich verstoh ned... Till? Wieso schwätzisch du französisch? *(lacht)* Ich... ich chume ned drus.

Mirco: Ich verstehe auch nischts mehr! Rien!

Mira: *(denkt nach, erotisch)* Ach so, das isch en Aaspielig uf öisi Flitterwuche z Paris. Es Rollespiel. Ich finde das total heiss. Oui oui... c'est très sexy...

Mirco: Je ne comprends pas! Que se passe-t-il ici? *(steht auf)*

Mira: Französisch tönt so romantisch! Schwätz witer... *(kommt ihm näher)*

Mirco: Vous êtes folle!! *(weicht aus, stolpert in die Koffer)*

Mira: Du machsch mich ganz wuschig! *(knurrt ihn an)* Rawrrrrrr!

9. Szene: Gib de Koffer her!

Mirco, Ben, Mira

Ben: *(kommt vom Gate A, erleichtert)* Till, do bisch jo äntlich!

Mira: *(erschrickt)* Ben!? Sit wenn stohsch du do!?

Ben: *(ignoriert)* Mir händ dänkt, mir händ dich verlore! Alles in Ordni!? *(kollegiale Umarmung, schaut Mira an)* Ähm... mir händ scho dänkt, mir händ ihn... *(Einfall)* uf em WC verlore! Ich han scho Angst gha, dass er i d Schüssle gheit isch...

Ansage Flughafen: *(ab Band)* Eine Information für Reisende mit dem Swiss-Flug LX8214 nach Teneriffa. Der Flug ist jetzt zum Boarding freigegeben. Wir bitten alle Passagiere, sich zum Gate A23 zu begeben. Das Boarding erfolgt in Kürze.

Mira: *(unangenehme Stille, beschämt)* Ich glaub ich gang mol öises Gate goh sueche! Ned, dass mirs nachher ned findet... *(geht bei Gate A ab)*

Ben: *(zeigt auf Hals)* Till, du hesch do öppis... isch alles in Ordning?

Mirco: Was ist eute eigentlich los!?

Ben: *(überhört)* Jo genau, du seisch es: WAS isch los? Was isch passiert!?

Mirco: Isch...

Ben: *(unterbricht)* De Alex und ich, mir sind hüt Morge do ufgwacht und wüssed nüme was passiert isch. *(hysterisch)* Wo bisch du gsi!? *(packt ihn an Schultern)* Wo hesch du gsteckt!?

Mirco: *(läuft rückwärts, stolpert nochmals in die Koffer)* Isch...

Ben: Weisch was: Ziit zum Schnurre, händ mir im Flugzüüg no gnueg! *(schaut um sich)* Wo isch jetzt wieder de Alex und d Lena!? Mir müend zum Gate! *(ungeduldig, denkt nach)* Die beide sind sicher scho det! *(packt den Rucksack und die Koffer)* Mir verpassed no de Flug!

Mirco: *(nimmt seinen Koffer zurück)* Entschuldigung...

Ben: *(lacht irritiert)* Jetzt lahn los... ich chan de Koffer scho näh!

Mirco: Monsieur!

10. Szene: C'est fini!

Mirco, Ben, Alex

(Alex kommt von Gate A)

Ben: Jo, Monsieur, gib jetzt ane! *(irritiert)* Wo isch s Problem!? *(reissen sich gegenseitig den Koffer aus der Hand)*

Alex: Ben, was machsch du do! Gib dem arme Maa de Koffer zrugg!

Ben: *(beruhigt)* Guet bisch du do! Hesch du kei Ohre!? Mir müend zum Gate!

Alex: Hesch du de Till demfall ii de Zwüscheziit gfundel!?

Ben: *(irritiert)* Hä!? Do stoht er jo... mach doch d Auge uf!

Alex: Du Lilalapitatschi! Das isch doch ned de Till!

Mirco: *(explodiert)* Jetzt ist genüg! C'est fini! Ich bin nischt diese Till, jamais... niemals... Till! Till! Till! Sehe isch etwa aus wie eine Till?!

Ben: Äh jo...

Alex: Er gseht nur us wie de Till, er isch aber ned de Till! Crazy oder!! Er isch im Till sin Doppelgänger!

Ben: *(irritiert)* Hä!? Wie meinsch das?

Mirco: Meine Name ist Mirco! MIR – CO, pas Till! Wer ist überhaupt diese Till? Ich verstehe gar nichts, rien du tout! *(geht zu Ben)* Seit zehn Minüt: Alle schreien misch an! *(Ben streckt aus Versehen, aber für das Publikum offensichtlich, den Koffer von Lena entgegen)* Wollte isch nur essen eine Apfel. Aber diese eine Frau küsst mich! *(packt den Koffer)*

Alex: *(erschrickt)* Verreckt! Jemand hat sie geküsst!?

Mirco: Diese Frau rawrrrt mich an wie eine Tigre! Ich bin hier für eine Business rendez-vous, sérieux – und ihr macht mich fou, complètement fou!

Ben: *(schämend)* Entschuldigung!

Mirco: Das ist eine Zirküs! Keine Flüghafen! Adieu!! Mon Dieu! *(geht ab bei Gate A mit falschem Koffer)*

11. Szene: Wie en Chatz!

Ben, Alex

Ben: Es isch verbi! Alex, mir sind am Arsch! *(atmet stark)*

Alex: Es wird alles guet! Mir müend eifach nomol guet überlegge.

Ben: Du muesch doch iigseh: Es isch Schluss – aus! *(fächert sich Luft)* Findsch es ned au so wahnsinnig heiss do inne?

Alex: Du bisch en Riese-Pessimist! *(nimmt die halbleere Bierflasche)* Es isch doch nur en Sach vo de Perspektive: Du würdsch vielleicht säge, die Fläsche isch halb leer! Ich würd säge, die Fläsche isch halb voll!

Ben: Lueg doch do inne. *(kippt die Flasche in Alex' Gesicht)* Öisi Fläsche isch leer! Öisi Ziit isch abgloffe...

Alex: *(schreit)* Spinnsch, das arme Bier... und mini Haar!

Ben: *(hysterisch)* Verstoh doch! *(weinerlich)* Mir müend die Hochziit abblose! Mir händ de Till verlore!